



CUMÜN DA SCUOL

SCOULAS

ARDEZ, FTAN, SCUOL, SENT, TARASP

UORDEN DISCIPLINAR

A. In general

Intent

Art. 1

- a) L'uorden disciplinar serva insembel cul uorden da scoula a raggiundscher l'intent da la scoula tenor l'art. 2 da la ledscha davart las scoulas popularas dal chantun Grischun (ledscha da scoula) a sustgnair la magistraglia, la direcziun da la scoula ed al cussagl da scoula per ch'ella possa accumplir ils dovairs tenor l'art. 59 da la ledscha da scoula ed a sgürar üna gestiun da scoula reglada.
- b) L'uorden disciplinar regla la cumpetenzza da las autoritats da scoula e da la magistraglia sco eir la procedura in cas da cuntravenziuns da scolaras e scolars.

Validità

Art. 2

- a) L'uorden disciplinar vala per tuot ils uffants da las scoulas e scoulinas dal cumün da Scuol, fin al mumaint chi sortan da la scoula.

B. Reglas da cumportamaint

Disciplina in scoula Art. 3

- a) Ils scolars e las scolaras han da's cumportar tanter pèr cun tact e toleranza. Ils scolars e las scolaras han da demuossar maniera ed avair respet ün cun l'oter sco eir invers la magistraglia, las autoritats ed il personal da scoula.
- b) Ils scolars e las scolaras han da resguardar l'urari da scoula.
- c) Ils scolars e las scolaras han d'obedir a las directivas da la magistraglia, da las autoritats da scoula e dal personal da scoula.
- d) Ils scolars e las scolaras han d'interlaschar tuot quai chi disturba la gestiun da scoula.
- e) Dürant las posas pon ils scolars e las scolaras bandunar l'areal da scoula be cun permiss d'ün magister o d'üna magistra. Ir in butia d'ürant las posas es scumandà. La magistraglia pissera pella survaglianza da la posa.
- f) Violenza psichica, fisica e verbala nu vain tolerada ne sül areal da scoula ne pro occurrenzas da scoula.
- g) Id es scumandà a scolaras e scolars d'avair pro sai e da dovrar ogets privlus.
- h) Telefonins pon gnir dovrats dals scolars e da las scolaras d'ürant il temp da scoula be sün avis d'ün magister o d'üna magistra.

Obligs dals rapreschantants legals

Art. 4

a) Ils rapreschantants legals sun in dovair da trametter a scoula ils uffants regularmaing, posats ed abels da seguir l'instrucziun. Absenzas da scoula ston gnir motivadas dals rapreschantants legals e gnir comunicadas a temp al magister o a la magistra da classa. I vala il reglamaint da jokers.

Localitats, Indrizz, urdegns

Art. 5

a) Id es da resguardar ils reglamaints d'adöver chi existan per las localitats e pels areals da scoula sco eir las directivas correspudentas da la magistraglia, da las autoritats da scoula e dal persunal da scoula.

b) Ils scolars e las scolaras han d'avair pisser da las localitats e dals areals da scoula, dals urdegns e dal material da scoula. Tenor l'art. 19 par. 3 CCS (ZGB) pon persunas minorenas, chi sun ablas da güdichar, gnir obliadas da star bun per accziuns scumandadas ed/o intenziunadas.

Scumonds a regard fûmar, consûm d'alcohol e drogas

Art. 6

a) A scolars e scolaras dal cumûn da Scuol esa scumandà da fûmar e consûmar bavrondas alcoholicas sül areal da scoula ed in scoula. In cas da cuntravenziuns vegnan ils rapreschantants legals infuormats.

b) Il possess, il commerzi ed il consûm da drogas da tuot gener sun scumandats. In cas da cuntravenziuns vegnan infuormats ils rapreschantants legals ed il delict vain annunzchà immediatamaing a la pulizia chantunala.

Sain da not

Art. 7

a) L'ura da sain da not vala sco temp d'orientaziun pels rapreschantants legals.

C. Chastis disciplinars, cumpetenzas e proceduras

Chastis disciplinars Art. 8

a) Surpassamaints da l'uorden disciplinar sco eir mincha deport deplazzà in o dadour scoula vegnan chastiat in leivs cas tras la magistraglia ed in cas agravants tras la direcziun da scoula respectivamaing tras il cussagl da scoula cun comunicaziun als rapreschantants legals.

b) Surpassamaints da l'uorden disciplinar vegnan chastiat cun admoniziun, lavurs da chasti o lavurs specialas suot survaglianza.

c) Dûrant il chasti sto l'uffant gnir occupà in môd adequat. L'occupaziun d'ûrant il chasti e la lavur speciala survagliada dessan star scha pussibel in connex culla materia da scoula.

d) Multa: Sch'ün scolar o üna scolara resta repetidamaing absaint(-a) a l'instrucziun sainza s-chüsa, po il rapreschantant legal gnir chastia, tenor l'art. 96 da la ledscha da scoula dal chantun Grischun, cun üna multa fin 5000.- frs.

Cumpetenzas

Art. 9

a) La persuna d'instrucziun po admonir a bocca o in scrit, dar lavurs da chasti e disponer da chastis fin ad ün mez di per cas. Scha'l chasti surpasa ün mez di, es la cumpetenzza da chastiar pro la direcziun da scoula respectivamaing pro'l cussagl da scoula.

b) La direcziun da scoula e'l cussagl da scoula pon disponer da tuot ils chastis disciplinars.

c) La magistraglia ha il dret da confiscar ogets privlus e/o seccants dals scolars o da las scolaras.

Sclerir il fat, dar audienza

Art. 10

- a) Id es da sclerir il möd e las circumstanzas da la cuntravenziun disciplinara. Al scolar o a la scolara esa da dar audienza.
- b) Scha'l chasti düra daplü d'ün mez di o schi vain in dumonda üna lavur speciala survagliada chi düra daplü d'ün mez di, esa da dar audienza eir als rapreschantants legals avant co decider. Quels pon pretender la decisiun in scrit cun indicaziun dals motivs.

Protesta

Art. 11

- a) Cunter decisiuns da chastis disciplinars da la scoula po gnir fat recuors pro'l cussagl da scoula. Il cussagl da scoula decida definitivamaing.
- b) Cunter decisiuns dal cussagl da scoula in prüma istanza po gnir recurrü al departamaint chantunal d'educaziun.

Persunas da survaglianza

Art. 12

- a) Las persunas da survaglianza sun:
- il cussagl da scoula
 - la direcziun da scoula
 - la magistraglia
 - il persunal da scoula (pedels)


D. Disposiziun finala

Disposiziun finala

Art. 13

- a) Quist uorden disciplinar aintra in vigor als 19 d'avuost 2019. El rimplazza tuot ils uordens existents fin qua.

Cussagl da scoula Scuol


.....
presidenta

Quist uorden es gnü approvà dal cussagl da scoula in sia sezzüda dals 25 da gün 2019.

Scuol, in gün 2019